

TSHISHINA KA NATIKUT

Tanien Pone

Kuna nateu itakanu. Ek^u ne ka-uishaushikuaua ekute uieuepinishtamat itakanu nishtam kuna e pimutet napinnit.

Tshek ekue aimikut itakanu :

- Nishtuau tshika matenimin, itiku itakanu, tshe ishpishipipuk, pipuki. Pishimuss, tshishe-pishim^u mak epishiminishkueu, eukuan tshe matenimin.
- Eshe, iteu.

Ek^u miautat tshekuannu, itakanu. Kassinu mautau tshekuannu eshpish mishkak : pineua, shishipa, kassinu piminu kie e pipimiushinit, kassinu tshekuannu, namesha kie. Ek^u itakanu tshek ushkat tekuatshinnit ek^u munataukaik ek^u uitsh itakanu, anite napate nasht anite atamitaut tshetshi tat tshek tshishinniti, kie anite napate muk^u itutitashu anite tshetshi apishuniti. Eukuan etit itakanu, ek^u iapishuniti.

Tshek ekue uapamat itakanu pishimussa, pishimua. Uiapamat ek^u kuetuet, piminu kutuatsheu. « Mita ushkat nikutuatsheuati », ekue itat itakanu. « Ka-papatshikunua », ishinueu e shakapueshiniti. Ek^u iteu itakanu : « Ek^u eshpish shakapueshit ne, piapatshikut, ek^u uenuit. Apu nasht tshitishit. »

Minuat niatikut, eukuannu ek^u tshitshue, shash an. « Eukuannu minekashish etat », ekue itat itakanu. Iapit piminu kutuatsheu, kie nenua e pimiushiniti nameshtekua. Ek^u iteu : « Minuat nenu ekuana uenuit, eukuannu meshta-pitshikashut mishkumi. »

Minuat nenu niatikut itakanu, eukuannu tshitshue, tshitshue eukuannu minekash etaniti. « Tshekat ashtueshkam^u nitishkuteminu, apu tshi ushkat tshi kutueuk », ekue itat itakanu. « Eukuan ek^u nasht nikutshinan tshekat », iu itakanu. « Apu tshi minukatet, tshék ekue minukatet. » Tshék ekue tshi minukashak kuetuet. Piminu eukuannu nameshtekua, namesh-piminu eukuannu eshi-kuetuet. « Eukuannu minekash tshitshue epit. Inn tshitshue mishta-papatshikunnu utashtamik^u, ek^u uenuit. Ek^u katshi unuit niate », ekute anite katshi ununiti, « ekue unuinashauk », ekue itat itakanu. Unuinashaeu. « *'Eshe tapue nussim, tshimitunenitenashapan'*, nitik^u », ekue itat itakanu. *'Apu minuat tshika nita itashpinet auen tshetshi kutshit, eukuan eshpish mitunenitamin'*, itikutshe.

Tapue ma apu nita kutshit shuk^u itakanu innu. Eukuan nanitam itashpinepan itakanu auen e tshishinnit, e kutshit.

Eukuan eshpish tshissenimak.